

四庫全書

史部

欽定四庫全書

皇朝文獻通考卷六

田賦考

六

水利田

臣等謹按古者畫井分田制為溝洫畎澮以達於川廣深尋丈俱有定式蓋無在而非水利而稻人掌稼下地所謂畜水止水蕩水均水舍水寫水之法即後代言水利者之權輿也自阡陌既開而引

渠溉田之利紀於前史爭為美談洪惟我

朝

列聖相承念切民依廣興水利東南則籌疏導之方西北則資灌溉之益民生樂利及於無窮我

皇上御極以來尤以水利為要務淮揚畿輔之地經理宣導厥有成績迺者復以江淮充豫頻年積潦

特命廷臣會同守土大吏講求宣洩之要

指授方略諄切周詳不惜工不愛帑不勞民遂使沮洳

下濕之處皆成沃壤而猶

宵旰憂勞有加無已所以為閭閻籌久安者至深且遠  
允宜悉著於編以垂示萬世

順治九年以工科給事中胡之俊言經理東南水利之俊疏言方今天下財賦半出東南而東南要地莫如江浙蘇松嘉湖地勢汙下舊劉家河吳淞江等處海口壅淤河道成田土豪占據水患屢告請濬吳淞以洩陳澱之水濬劉河以洩巴揚之水

庶於國計民生有賴

十一年

諭東南財賦重地素稱沃壤連年水旱為灾民生重困皆因失修水利致悞農功該督撫責成地方官悉心講求疏通水利以時蓄洩庶水旱無虞民安樂利

十六年修浙江海鹽縣海塘禮科給事中張惟赤言杭嘉湖蘇松常鎮七郡皆瀕於海海塘築自唐開元中至明始易以石編立字號并編定夫銀以

事歲修他郡無論即修海鹽一處之塘歲編銀六千九百九十九兩零自明末至今並未修築此塘不知此項作何支修應請定限歲修以防水患工部議如所請卽於是年修致雨二號石塘二十一丈明年復修閏餘二號成歲二號石塘共六十丈康熙二年以近畿地方夏潦遣官察看並經理修隄挑淺事宜雲南道御史梁熙言近畿田地分與八旗今歲夏多雨各處堤岸潰決損壞田禾收成

絕少河間一帶莊屯淹沒更甚請遴材幹官周行  
察看凡堤岸之應修者實行培築淤淺之應疏者  
實行挑濬庶河流有歸潦不為災從之

十年截留蘇松常三府漕折銀九萬兩杭嘉湖三  
府漕折銀五萬兩以充水利經費為疏濬吳淞江  
及劉家河故也

十一年濬吳江長橋一帶以洩太湖

十二年修河南安陽縣之萬金渠引洹水溉田

二十年濬常熟之白茆港武進之孟瀆河

二十五年遣官往淮揚下河督率挑濬車路等河  
并串場河白駒丁溪草堰場等口

三十六年

諭漕河督臣會勘下河積水應作何盡令歸海涸出民田  
之處一一議奏漕運總督桑格等言下河為泲水入海  
之區自淮安以至邵伯鎮計運河東岸共有涵洞  
三十牕十滾水壩八運河及高郵邵伯等湖之水



由諸涵洞牘壩之口歸入射陽廣洋等湖以至白駒岡門等口入海緣下河受水之處甚多而洩水入海之口猶少是以水勢汪洋易於停蓄下河州縣均受水害因議疏浚各口及應建牘壩之所疏入工部議准令將各項工程估計具題從之

三十七年

諭大學士等曰霸州新安等處水災旗民莊田皆沒蓋由保定府南之水與渾河會流以致汎濫著原任河道于成

龍河督王新命往察令其分流農事方興不可用百姓之力遣旗下壯丁備器械給以銀米令其修築又

諭于成龍王新命曰清河發源太行山脈會漳河子牙河  
滹沱河易水諸流其勢雖盛但堅築堤岸遏之即可無  
虞又漳河支流經大城縣入子牙河其勢湍悍數年以  
來諸處遭水此河之故爾等宜詳悉查勘至渾河發自  
馬邑甚微每遇大水之年則橫流汎濫致淹民田其故  
盖由渾河淤沙既多春時水乏保安州以下居民又引

灌田沙礫壅墊河身積高淫雨水發遂致田土冲沒爾等惟挑濬淤沙令水暢流當不至於漲溢矣

復

命廷臣會議開下河漕運總督桑格等又言臣等會勘下河州縣歷被水災皆由上游受水之處多而洩水入海之處少魚之各邑水道俱多淤澱以成泛溢之患今欲救此灾黎舍開浚故道多分水勢之法別無善策臣等前議修芒稻河者欲分高郵邵伯

兩湖之水入江使不至下河也議挑曹家灣湯家  
絆七節橋者欲開通高郵邵伯兩湖淤塞之水路  
使通芒稻河以下江也議挑車兒埠之稻子河者  
欲使泰州所受之水由苦水洋入海也議挑澗河  
者欲分運河之水流入澗河由射陽湖下海使不  
至高郵也議挑海陵溪者欲使高郵所受之水通  
岡門下海也議挑車路白塗海溝三河者欲使興  
化所受之水由丁溪草堰白駒入海也議挑蝦鬚

二溝夏梁河并滕隴河西首淤塞之射陽湖者欲使高寶興秦鹽山等處之水俱由廟灣下海此海口為下河最窪最寬之地洩各處上流之水尤為宣暢也今臣細加覆勘與前無異惟是九鄉會議所云江海有無倒灌之處臣等細察各處海口及江口皆係歷來洩水之舊跡而臣等所議挑浚諸工皆內地淤阻之河道照舊開通使水得達於口洩之江海自無倒灌之虞又會議所云或係海口

高阜內河低窪以致積水不能出海臣等相度形勢海口較之內河終屬低窪現在洩水而目今水勢尚在汪洋民間被淹田地多未涸出皆由諸河水道淤塞之地若使前議挑浚之工一舉水循故道下流入海民田自當涸出實大有益於生民

又

諭大學士等曰下河民生攸繫從前命凱音布孫在豐等專司開濬伊等俱奏工程告竣由令觀之止是虛糜國

帑水勢並未消滅田畝並未涸出所謂有益民生者何  
在今桑格又奏當行開濬而九卿遽議准行若果如其  
所請疏鑿開濬而桑格等能必水即消田即出有裨於  
民以身家保奏則即令開濬之可令九卿詳詢前次督  
濬者復稽考諸冊籍然後確議以聞

三十八年

諭下河既有積水不得不引出歸海著將串場河射陽湖  
蝦鬚沙溝一帶挑通引積水流入歸海至四十年河道

總督張鵬翮言高寶山陽鹽城一帶之水由射陽  
之蝦鬚二溝入廟灣以達於海今宜挑蝦鬚二溝  
淤塞之處約四十餘里引水入滕隴河以達海高  
郵滾水壩下之水由興化縣安豐鎮至白駒場以  
達於海今宜挑鮑家莊至白駒地高水壅之處約  
八十餘里高郵之水又自興化車路河至丁溪由  
滂魚港以達於海今宜挑滂魚港淤塞之處八十  
餘里寶應之水由于嬰溝老河口入射陽湖以達



於海今宜挑老河口淤淺之處三里有餘泰州之水由淤溪至車兒埠溜子河以入於海今宜挑溜子河三十二里引水由苦水洋入海得

旨允行

四十三年令天津開墾水田時以天津附近荒地開墾一萬畝為水田令各省巡撫將閩粵江南諸處水耕之人出示招徠情願者安插天津諸處計口授田給與牛種限年起科

四十六年

諭工部曰江南浙江生齒殷繁地不加增而仰食者日衆其風土陰晴燥濕及種植所宜迥與西北有異朕屢經巡省察之甚悉大約民恃田畝為生田資灌溉為急雖東南民稱水鄉而水溢易泄旱暵難支夏秋之間經旬不雨則土圻而苗傷矣濱河低田猶可庠水濟用高仰之地力無所施往往三農坐困朕為民生再三圖畫非修治水利建立閘座使蓄水以灌輸田疇無以為農事

緩急之備江南省蘇州松江常州鎮江浙江省杭州嘉興湖州各府州縣或近太湖或通潮汐宜於所有河渠水口度田建閘隨時啟閉水有餘則宣洩之水不足則潴蓄以備用其有支河港蕩淤淺者並宜加疏濬使引水四達仍行建閘多蓄一二尺之水即田高一二尺者資以灌溉矣多蓄四五尺之水即田高四五尺者資以灌溉矣行之永久可俾高下田畝無憂旱潦此於運道無涉而於民生實大有裨益爾部速移文該督撫等今

將各州縣河渠應建閘蓄水之處並應建若干座通行  
確察明晰具奏爾部即遵諭行

四十八年濬寧夏之宋澄堡李洋堡二渠引黃水  
溉田建閘壩十三以時蓄洩

五十九年

命修築浙江海塘工部議准浙江總督滿保等奏一議築  
海寧縣老鹽倉北岸石塘以保護杭嘉湖三府民  
田水利一議開中小壘淤沙以復江海故道以免

潮勢北冲一議築上虞縣夏盖山石塘以防南岸  
潮患又據浙江撫臣議准海寧老鹽倉等處原議  
修築石塘但海潮遷徙靡定請於土浮不能釘椿  
砌石之處改築草塘至六十一年巡撫屠沂疏言  
海寧縣石塘五百丈草塘一千五十五丈上虞縣  
石塘二千二百五十六丈先後告竣動用銀十四  
萬三千六百五十兩其中小壘淤沙應挑之處今  
北岸石塘已固應停其挑濬從之

雍正元年議政王大臣等議准修築海寧塘工

諭曰錢鏐所築塘堤中間雖被冲壞至今間有存者數年來督撫等所修塘堤俱虛冒錢糧於不當修築處修築以至隨修隨壞又聞赭山有三處海口今一處淤沙壅塞水不通流若濬治疏通使潮汐不致留沙壅塞則海寧一帶塘工方可保固言之者雖未必稔知然不可不留意抑或地方大臣恐糜費錢糧此等處雖明知而不顧也爾等傳諭該督撫知之

二年

命尚書朱軾往浙江會議修築海塘事宜朱軾會同浙江撫臣議言餘姚縣東自澥山鎮西至臨山衛六十里舊有土塘三道內一道為老塘離海三四十里或十餘里即昔時之海岸歷年沙淤百姓開墾報陞自築土塘二道是為外塘今議加高三四尺加厚五六尺又自臨山衛至上虞縣界之烏盆村十五里自村至會稽縣漚海所四十五里有石塘二

千五百餘丈

即康熙五年  
八年所築

其東西兩頭土塘七千

丈坍塌甚多擬於塘底開深二尺填築亂石上鋪

大石寬六尺高六尺貼石築土寬二丈高一丈三

四尺又仁和縣之翁家埠起西至海寧縣之陳文

港七十餘里舊有石塘無庸議修自陳文港至尖

山二十餘里草塘七十四丈亂石砌邊土塘三千

七百二十六丈應將土塘加寬一丈五尺高三尺

上鋪條石厚一尺其草塘亦如式改修又塘外原



有亂石子塘寬三四尺不等外加排椿年久欹斜  
剝落應修全完固其原無子塘者亦如式興修又  
海鹽縣東自秦駐山三澗寨起西至演武塲石塘  
二千八百丈年久塌壞八十餘丈去秋風潮衝潰  
七十丈應照式修築又自演武塲至平湖縣之雅  
山砲臺一帶土塘見在地方官加修月內可以完  
工以上估修銀十萬五千七百餘兩又會同江蘇  
撫臣議言松江府之華亭婁上海等縣沿海二百

五十餘里地勢窪下土脈鬆泛捍海塘工較他郡尤要自金山衛城北十里起至華家角止四十餘里土塘六千二百餘丈內最險工一段自滌關墩至東灣九百六十九丈六尺次險工四段自金山墩至西墩七百六十八丈兵廠至張家舍二百八十八丈倪家路至三岔墩三百六十丈周公墩至華家角一千四百六十八丈八尺俱應易土為石以資保障其餘二千四百餘丈水勢稍緩宜堅築

土塘用條石鋪底砌邊外釘排樁自華家角至上  
海之頭墩十餘里塘外淤沙一二里不等自頭墩  
至嘉定縣界一百二十里舊有土塘二道內為老  
塘外為新塘應俱加築高厚外塘仍密釘排樁以  
防衝潰以上估修銀十九萬二千九百餘兩疏上  
令依議速行

詔修濬杭州西湖令督撫察勘會議總督滿保等議言錢  
塘仁和海寧三縣田畝數萬頃賴城外上下兩塘

河水以灌溉而兩河之水皆源自西湖謹按西湖舊志三十餘里有民人占為田蕩阻遏水道納於官者每年僅銀三十餘兩米二十餘石其為官民利益甚微而所損於民者實不止於鉅萬應請豁除糧額清出歸湖其見存湖址二十二里有竒通計裏外湖面一萬一千三百一十五畝零淤淺硬沙葑灘共三千一百二十二畝應將淺涸者挑深淤塞者開濬芟除葑草以復故址則湖水不至

涸竭而三縣民田旱潦有備矣至於城內之河共有數道一為中河一為東河一為小河而小河又有中西北之分昔人設筭鑿溝引西湖之水自湧金水門入城曲折出入凡三十里然後由桃花港響水閘會流於上下兩塘河以溉田畝是城河正所以通西湖之血脈也今當相其淺塞量請開濬庶幾水利可復疏入准部議行於是年興工四年工竣

三年

諭江浙沿海黎庶全賴堅築海塘捍禦潮汐事關民瘼朕時在念著動支司庫錢糧立限堅築尅期報完務使永保安瀾毋得因循延緩亦不得草率塞責

又

命怡親王允祥大學士朱軾察勘直隸水利繪圖進呈

四年

諭九卿曰怡親王陳奏畿輔西南水利情形披覽甚為明

卷六  
晰著交與九卿會議具奏怡親王等於去冬今春奉命  
察看水利前後往返三月餘而於直隸地方東西南三  
面數千里之廣俱身履其地不憚煩勞凡巨川細流莫  
不窮源竟委且因地制宜準今酌古曲盡籌畫以期有  
益民生公忠為國甚屬可嘉

是歲設營田水利府以怡親王等董其事初於灤  
州玉田諸州縣濬流築圩建閘開渠皆官為經理  
民人願耕者官給帑銀以為工本秋成時歲收十

分之一足額而止募江浙老農課導耕種之法有  
力之家率先遵奉者以圩田多寡分別獎賞其濬  
疏圩岸以及潄水節水引水库水之法各因地勢  
次第興修所需農具水車等募江浙工匠如式製  
造課本地工人習之是秋田之成熟者凡百五十  
頃有奇而民間自行播種者若霸州文安大成保  
定新城安肅任邱共七百一十四頃有奇多獲秋  
登五年分立營田四局一曰京東局轄豐潤玉田



薊州寶坻平谷武清灤州遷安自白河以東凡可  
營田者咸隸焉一曰京西局轄宛平涿州房山涿  
水慶都唐縣安肅新安霸州任邱定州行唐新樂  
滿城自苑口以西凡可營田者咸隸焉一曰京南  
局轄正定平山井陘邢臺沙河南河磁州永年平  
鄉任縣自溇滏以西凡可營田者咸隸焉一曰天  
津局轄天津靜海滄州暨興國富國二場自苑口  
以東凡可營田者咸隸焉局各有長有副有效力

委員凡相度估料開築建造皆委員與地方官偕而查報地數花名給發工本則專責之地方官水田既成令地方官遵前規而以時達之水利營田府自五年設局至於七年營成水田六千頃有奇京東局 王田縣袁家莊馬營曲河頭羅畢窩等處營田引小泉暖泉孟家泉黃家山泉藍泉諸水豐潤縣橫估王蘭莊刁家窩曹家泊盧各莊車道鋪望林泊梁家灣胡家泊等處營田引陡河泥河

黑龍潭楊家洪諸水遷安縣徐流營三里河泉莊  
等處營田引徐流河三里河黃山泉諸水灤州冉  
各莊孟家店黃家莊等處營田引沂河暖泉福山  
泉諸水平谷縣龍家務水峪等處營田引洵河及  
山泉之水薊州山岡莊鄭各莊馬仲橋等處營田  
引大小海子諸泉水洩水於淋河寶坻縣八門城  
尹家園下汪各莊等處營田引薊運河潮水寧河  
縣東窩莊南窩莊岳旗莊江潢口林家莊張家莊

齊家估田家莊等處營田引蘄運河潮水武清縣  
桐林等處營田引鳳河水 京西局 新安縣大  
殷淀太平莊趙家莊等處營田引電河依城河及  
淀河諸水安州東西壘頭南北馮村等處營田引  
依城河及淀河之水安肅縣白塔鋪古莊頭高林  
莊南梨園等處營田引督亢陂及電河之水唐縣  
明伏莊大洋村溫家莊等處營田引唐河水望都  
縣高嶺村侯坨村等處營田引隍池北隆建功湧

魚諸泉水涑水縣赤土村八岔溝等處營田引涑  
河水房山縣廣運莊高家莊南良莊長溝村等處  
營田引拒馬河挾河水涿州茂林莊毛家屯普利  
莊北魯陂等處營田引拒馬河胡良河水霸州魚  
廠村高各莊臺山平口等處營田引中亭水任邱  
縣關城村營田引白洋淀水文安縣蒼耳淀李齊  
淀流河淀等處營田引會同河子牙河水大城縣  
李齊淀流河淀營田引子牙河水定州吳家莊曹

家莊等處營田引小清河馬跑泉水行唐縣河合  
村歡同村等處營田引蓮花池龍泉諸水新樂縣  
大流村牛家溝等處營田引海泉湧泉諸水滿城  
縣一畝泉北奇村等處營田引一畝鷄距紅花諸  
泉水宛平縣蘆溝橋西北修家莊三家店等處營  
田引永定河水 京南局 磁州務本村張家莊  
太平莊杏園營等處營田永年縣張家莊南湖賈  
村馬道固村等處營田平鄉縣豆二莊周章村油

各村等處營田皆引滏陽河水任縣邊家莊牛新寨西北張村等處營田引滏陽并牛尾諸河水正定縣雕橋村王古寺順成關等處營田引大鳴泉小鳴泉方泉班泉諸水平山縣奉良莊川防村等處營田引漳沱河冶河水井陘縣防口村西河村洛陽灘等處營田引冶河水邢臺縣樓下村孔橋村小汪村等處營田引百泉及達活紫金諸泉水沙河縣北九家莊趙村等處營田引邢臺百泉及

小澧諸泉水南和縣豆村河頭郭楊家屯等處營

田引百泉水 天津局 天津州城南蓋田及賀

家口圍田靜海縣何家園吳家嘴雙港白塘口辛

莊等圍營田滄州葛估盤估二圍營田興國富國

二場東西泥沽二圍營田俱引海口潮水

雍正九年設天

津府改州為縣自何家園以下圍田皆隸天津

臣等謹按畿輔水利之議見於古者北魏裴延儻

為幽州刺史於范陽漁陽立渠堰溉田萬餘頃唐



瀛州刺史盧暉引滹沱溉田五百餘頃寧晉令程處默引洺水溉田平棘令弓志元開畢泓以蓄洩水利又鎮州獲鹿縣有大唐渠有禮教渠引太白渠溉田宋臨津令黃懋請於河北諸州作水利田而制置河北屯田使何承矩於雄莫霸州平成順安軍興堰六百里置斗門引淀水灌溉以足邊食元提舉諸路河渠郭守敬言水利六事一曰順德達泉引入城中分為三渠灌城東地一曰磁州東

北滏漳二水合流處引水由滏陽邯鄲洺州永年  
下經鷄澤合入灋河可灌田三千餘頃明汪應蛟  
巡撫天津於葛沽白塘種水稻畝收四五石疏請  
於朝以防海官軍萬人分田墾種而徐貞明水田  
之議尤詳京東諸州縣皆有其遺跡至我

朝雍正三年直隸以水患告既賑貸而撫恤之

特命怡親王等周履三輔大興營田引水溉田之法旌敘  
鼓舞之方既詳且悉其所設京東局則徐貞明之

遺規也京西局則何承矩黃懋之舊制也京南局則郭守敬之議可循天津局則汪應蛟之跡尚在分命官吏督率營治而民人亦有踴躍從事者數年之間得水田六千頃有奇而灌溉之利被於三輔矣

五年

諭地方水利關係民生最為緊要江南戶口繁庶宜更加修濬時其蓄洩以防旱澇我

皇考念切民依康熙四十六年巡省江浙

躬親講求將附近太湖及通江潮之處條分縷析

特頒諭旨令江浙督撫於蘇松常鎮杭嘉湖地方疏濬河  
港以資灌溉修建閘座以便啟閉皆動用公帑錢糧不  
使絲毫出於民力恩至渥也乃當時督撫諸臣不能實  
心仰體惟以虛文奉行糜費帑金二十餘萬而無實效  
深可痛恨今巡撫陳時夏特行奏請且稱費用不過十  
餘萬兩即可成功著副都統李淑德原任山東巡撫陳

世倌會同巡撫陳時夏總河齊蘇勒總督孔毓珣悉心  
踏勘詳加酌議凡建立閘座疏濬河流務期盡除淤塞  
以杜泛溢之虞廣蓄水泉以收灌溉之益其一應公費  
俱動用庫帑支給

又

諭曰朕聞陝西鄭渠白渠龍洞向引涇水溉民田甚廣歷  
年既久漸致淤塞堤堰坍塌醴泉涇陽等縣水田僅存  
其名特令該督岳鍾琪詳酌興修今據奏龍洞亟宜挑

它鄭白渠務當疏濬更須修築堤堰建設閘口以備堅  
久著動用正項錢糧及時挑濬務期渠道深通堤堰堅  
固俾民田永賴

又

諭蘇松地勢稍下特遣大臣會同督撫開濬水道太湖之  
水歸海者經劉河白茆河居多圖誌載二河形勢數十  
里一徑直趨入海年久潮沙堙塞悉成平陸太倉常熟  
之紳衿土豪佔種報科者十無二三今既開濬必盡去

卷六  
新漲地畝以復故道該督撫等當竭力秉公詳勘務為  
一勞永逸之策是歲陳世倌疏請先挑吳淞江白茆河  
孟瀆德勝九曲河其餘諸河俟完工之日以次開  
濬從之

議修揚州五塘以溉民田婁江水利告成士民請  
建

萬壽碑亭

諭速止之是月水利營田所進瑞稻一莖三穗或一莖二

穗

召入大學士等

賜觀

又

諭自古治水之法在順其自然之勢而利導之蓋水之為  
害者大抵由於故道堙塞使水不得徑直暢流以致泛  
濫為害但徑直之路堙塞年久或民間既已蓋造室廬  
開墾田畝或且安葬墳墓人情各顧其私不知遠大之



計今見欲於此地開濬河道則百計阻撓而司其事者  
未免惑於浮議遂使遷就紆迴苟且從事而不能成一  
勞永逸之舉昨據岳鍾琪奏陝西現在興修漢渠但開  
濬之處不無礙於墳墓故爾遲回朕諭之曰果係民間  
墳墓所在當給與買地之價令其遷葬民自樂從今江  
南興修水利著該督撫與欽差官員照此辦理

又

諭吳淞石塘當日勘估之時於海潮紆緩之處酌量修築

土塘蓋因工程浩大諸臣為節省錢糧起見故如此定議但東南財賦之區灌溉田畝保聚室廬全賴海塘捍衛海勢衝激風濤旋轉難定不若一例盡修石塘為百姓萬年之利著將現在土塘改築石塘不得惜費省工苟且塞責兩江總督范時繹奏報估計修濬太倉州河道工料銀兩且言太倉州鎮洋縣士民僉稱境內劉河已蒙發帑開濬其七浦河願依舊例業戶給食佃戶出力不敢再費帑金

上曰國家財用充足朕為地方籌畫萬年之利不惜多費帑金興修鉅工養育萬姓若仍用民力以辦公事非朕本心也著將士民捐助之處停止仍動用公帑辦理並曉諭該州縣士民伊等當體朕愛養元元之心於工程告竣之後歲歲修濬防護俾地方永受其益則勝於目前之趨事赴功多矣

八年

諭寧夏地方萬民衣食之源在於大清漢唐三渠之水利

定例每年疏濬修理使民田得沾灌溉聞歷年專司之員疎忽怠玩以致閘道堤岸逐漸損壞時有衝決渠身淤泥填塞日見淺窄而三渠之中惟唐渠為尤甚近來其口過低其梢過高水勢不能逆流而上多誤小民耕種之期雖每春定有歲修之例然不能以一月之工程整數十年之荒廢也見今兵部侍郎通智開濬惠農昌潤二渠於寧夏水利自然明悉著會同太常寺卿史在甲即行查議令歲預備物料明春動工修補務令三渠

堅固俾邊郡黎元灌溉有資永享盈寧之慶

九年遣太僕寺卿顧琮稽覈直隸水田除距水稍遠地勢稍高須車戽而升者聽民隨便種植外其水足地平無煩汲升之處令地方官具永遠可為水田結狀呈報戶部荒廢者如例議處又議設營田觀察使二員分轄京東西督率州縣營治可田地畝無力者貸以牛種秋收扣還設副使二員出資經理以為民倡所有舊田圍渠閘洞時加修治

毋致廢壞

十年

諭寧夏為甘肅要地渠工乃水利攸關朕特遣大臣督率官員開濬惠農昌潤二渠又令修理大清漢唐三渠以溥民利年來惠昌二渠及唐渠工程漸次告竣於民田大有裨益其大清渠漢渠雖未竣工然加謹堵築極力挑濬已足以資灌溉不過湃岸開座有應行修補之處可以從容經理查寧夏有專司水利之同知著將未竣

之渠工交與該員於每歲春工內分年陸續修理務期工程堅固利濟有資使民田永霑膏澤是歲又以甘肅所屬之瓜州地肥饒可墾將疏勒河上流築壩開渠引水入河又於安家窩鋪對岸導渠疏濬深通引水溉田至十一年陝西之柔遠堡鎮夷堡口外雙樹墩等地方開墾令開渠溉田十二年甘肅口外柳林湖地屯墾令築壩建隄開渠又陝西之中衛縣白馬寺灘地廣可耕令開渠建槽以資灌溉

議濬淮揚下河水道以濟鹽運溉民竈田

今松江府之奉賢上海南匯等縣修築捍海土塘  
江蘇撫臣喬世臣言金山華亭奉賢上海南匯五  
縣地方西抵浙江平湖縣界東至寶山縣接壤之  
黃家灣綿亘二百五十餘里舊有土塘以捍潮汐

雍正二年議自金山嘴至華家角四十餘里

係金山華

事二  
據地

俱易土為石次第告竣其華家角以東之舊

塘未經修築今年七月中海潮漫溢以致南匯上



海奉賢三縣被災較重今議修築土塘在奉賢者由華家角石塘起至南匯縣東界共九千三百二十七丈六尺在南匯者自奉賢縣西界起至上海縣東界共一萬五千四百六十四丈在上海者自南匯縣西界起至寶山縣界之黃家灣共一千二百二十三丈八尺俱底寬五丈面寬二丈五尺高一丈二尺共需銀九萬八千三百五十四兩零又黃家灣以北至寶山城四千二百二十八丈一尺

有奇舊塘亦頽廢並宜增築塘底寬五丈面寬二丈五尺共需銀一萬七千一百一十六兩零疏入命廷臣集議如所請行之

十一年

詔修揚州之范公堤

命內大臣海望等查勘浙江海塘海望等疏言浙江江海之門戶有三省城東南龕赭兩山之間名曰南大疊禪機河莊兩山之間名曰中小疊河莊之北寧

邑海塘之南名曰北大疊惟中小疊當南北兩岸之中江水海潮若由此出入則兩岸無虞但其地面不及南北兩大疊之半潮過沙淤偶通旋塞不從而南即徙而北南岸尚有龕常諸山連絡捍衛北岸惟恃一綫塘堤而已南大疊久淤成平陸數十年前尚有中小疊出入嗣後漸徙至北大疊今欲遏江海之狂瀾使其仍歸中道恐非人力所能為查海寧東南有尖山聳峙海口其西有小山俗

名塌山相去百餘丈水底根脚相連兩山之間向  
有石壩堵截水道後因修塘人役誤取其石見今  
江水大溜緊貼北塘直趨尖山塌山之間引入海  
潮衝激塘身護沙日卸若於兩山之間照舊堵塞  
使江水海潮仍向外行則北岸護沙可漲而水道  
亦可望其南徙至於華家街以東尖山以西一帶  
塘工有草塘并條石塊石塘不等應改建大石塘  
庶可垂永遠所需工料約銀一百八十餘萬兩非

歷數年之久不能告竣臣等見議塞尖山水口既  
堵之後果能漲沙護塘則石塘可不必改建如仍  
無漲沙再行改建似亦未遲也惟翁家埠一段草  
塘塘內地勢低窪及塘背附土單薄之處即應培  
補又石草各舊塘僅有一層應請於塘後添築土  
備塘一道比舊塘再高五六尺以禦風潮泛溢之  
害疏入

上曰所奏俱屬妥協著照所奏行朕思尖壩之間建立石

壩以堵水勢似類挑水壩之意所見固是若再於中小壩開引河一道分江流入海以減水勢似更有益從前雖經開挖旋復壅塞者皆因惜費省工之故今若倍加工力兩工並舉更覺妥備石壩建後即有漲沙而石塘亦當漸次改建以為永久之利其開挖引河著程元章等相度地勢酌量辦理

十二年兩江總督趙弘恩察勘松江海塘議於石塘外築貼石土塘一道從之


十三年閏四月河東總督王士俊言東平州之安  
山湖地勢低於運河其湖旁涸出之地請開墾以  
濟民食

上令部臣詳議

諭曰山東運河之水全賴諸湖停蓄以資灌注所以前人  
有水櫃之名後因諸湖淤墊居民侵占為田以致水少  
不能濟運朕屢降諭旨令河道總督等悉心經理近年  
始無水淺停舟之慮今王士俊此舉乃為開墾起見朕

思湖水專資濟運倘經理之初但貪田畝之有餘不計湖水之不足將來田多水少漕運稽遲則顧此失彼未免輕重倒置不可不慎之於始也遂

命止之





皇朝文獻通考卷六

欽定四庫全書

史部

皇朝文獻通考卷七至九

內閣中書<sub>臣</sub>寶汝翼覆勘

總校官中書<sub>臣</sub>孫溶

欽定四庫全書

皇朝文獻通考卷七

田賦考七

水利田

乾隆元年

諭紹興府屬沿江沿海堤岸工程停止按畝派錢于存

公項內動支興修著為例

又

論三代以前不言水利溝澮之制時蓄洩備旱潦尚書  
周禮所載為田功計者其利甚溥開渠引水溉田育  
穀始於戰國蓋因阡陌既開溝澮尋丈已失其舊也  
歷代言水利者得失參半總以相土宜順水勢為主  
今江南蘇松常鎮四府太倉一州現在興修支河仿  
河工海塘之例朕思渠港圩壩附近溉田原宜開濬  
以備旱潦但開濬之法須河身深廣蓄洩得宜挑取  
塗泥遠移他處或培窪下或築堤岸方為可久若堆

貯河旁水潦旋淤有名無實徒滋煩擾至古堤舊渠  
不為田害便宜仍舊改築甚無謂也今蘇松等處支  
河不比河工海塘之險古堤舊渠如元和至和等塘  
民利往來田資灌溉至今受益吳本澤國三江震澤  
支流四溢如邱與權單鏐郝亶趙霖夏原吉周忱所  
論水利考据精核得失瞭然今承修人員不逮前人  
止宜加修不必改築若按畝派錢以供大修朕已降  
旨停止嗣後督撫以至州縣建言為民興利或利小

而害大或利在目前而害伏於後或有利無害而其  
事難成皆宜詳審熟籌慎之於始以副朕惠養元元  
之至意

又

諭曰史書詳誌河渠經術兼明水利誠以國計民生所  
關也果使水道疏通脈絡派注陂澤非沮洳之數隄  
防有蓄洩之方旱澇有備而田廬無虞其有裨於閭  
閻誠非淺鮮我

皇考軫恤黎元興行水利凡直省泉源河湖莫不濬導俾  
民得以灌溉轉瘠為腴至於蘇松之太湖吳淞白茆  
劉河歸海要道淮揚之槐子烏塔河泰州如皋運河  
串場車路海溝等河尤不惜帑金專員督理建閘築  
堤按時啟閉使近水田畝均沾膏澤利賴甚溥但自  
開浚以來已閱數年圩岸不無坍塌沙泥不無淤積  
與其歲久濬築事難費倍不若逐年疏葺事易費省  
著令管理水利河務各官及濱河州縣各於所屬境

內相視河流淺阻每歲農隙募夫挑挖定為章程逐年舉行

二年

諭養民之道必使興利防患水旱無虞方能使益藏充裕緩急可資是以川澤陂塘溝渠隄岸凡有關乎農事務籌畫於平時斯蓄洩得宜潦則有疏導之方旱則資灌溉之利非諉之天時豐歉之適然而以臨時賑恤為可塞責也直隸今年夏初少雨深以暵旱為



憂及連雨數日尚不甚大而永定河隨有漲溢之患  
雖因山水驟發然水性就下其經行之地自有定所  
設預為溝渠以洩之為塘堰以蓄之自可以殺水勢  
不至滙為洪流衝突漫衍如此之甚異皆平日不能  
預先籌畫所致也東南地方每有蛟患者之於古季  
夏伐蛟載在月令今土人留心者尚能預知有蛟之  
處掘地得卵去之則不為害且蛟行資水遇溪澗而  
其勢始大田疇雖不可移而廬舍塋厝尚可遷就高

阜之地以避之是亦未嘗不可先事預防該督撫有  
司務以生民利賴為先圖一切水旱事宜悉心講究  
應修舉者即行修舉或勸導百姓自為經理如工程  
重大應動用帑項者即行奏聞妥協辦理興利去害  
俾旱澇不侵倉箱有慶以副朕惠愛黎元至意

又

諭直屬營田水利昔年蒙

皇考世宗憲皇帝特命怡賢親王大學士朱軾查勘地方

情形不惜數百萬金錢興修經理已有成效然溝渠  
澮洫堤埵圍埂之屬必須隨時修葺歲加補治方於  
田功有益今歲春夏間雨澤愆期各州縣水田多未  
動植則溝渠各項勢不能無廢棄之處倘地方有司  
不隨時整理必悞明歲春耕夫州縣地土原有高下  
之不同其不能營治水田而從前或出於委員之勉  
強造報者自應聽民之便改作旱田以種雜糧若附  
近水次可以營治之田而從前已經開成者倘因本

年未曾種稻遂至廢棄殊為可惜著李衛飭行各州縣分別查明將實在可垂永久之水田勸諭民人照舊營治毋得任其荒蕪其溝渠各項有應行修葺者即於農隙之時酌給口糧督率修治

三年

諭曰聞直隸保定河間兩府所屬地方夏月多被水淹深秋之後地雖涸出而積水仍未全消推求其故則州縣舊有渠淀居民耕種漸有收穫恐被爭占遂報

壅升科及耕種既久壅培漸高而水不下注矣又聞  
各處多有涸河當有水時由此宣洩無水竟成廢地  
近河居民築埂築壩為蓄聚灌溉之用以致河道阻  
塞水不通流高阜有水歸於卑下而卑下之水無地  
注之此積水難消之由也著飭各州縣將舊有之渠  
浚查明造報毋得隱匿若有已經陞科者免其賦稅  
其有涸河之處亦行確勘不得築埂壩以阻河流之  
故道庶積潦不致為害於地方實有裨益

遣大理寺卿汪漭總辦江南水利工程兩江總督  
那蘇圖言臣等往淮揚會勘署撫臣許容所奏應  
浚河道與水利農田原屬有益惟聞沿河一帶邊  
土較高興泰寶鹽等處地方低窪形如釜底必須  
測量地勢隨宜辦理如蒙簡差在京熟諳水利工  
程大員相度董率方為有濟遂有是

命

四年

諭水利工程重大著通政使德爾敏同往辦理大理寺卿汪滢等言山陽阜寧之漁濱河興化縣之白駒閘下引河高郵之通湖橋馬飲塘河江都之灣頭河通州分司所屬之十鹽場河通州之黃河洋范公堤俱應疏浚興修又鹽城之新興場河阜寧之廟灣場河宜及時疏浚以工代賑俱從之

又

諭今年六月間開封等屬被水州縣甚多已屢降諭旨

多方賑恤因思濟饑拯溺目前之補救維殷而陂澤  
河渠善後之經營宜亟查豫省地方有淮潁汝蔡諸  
水經緯其間凡舊有河道俱達江湖第或故道被湮  
或無支河導引是以水無容納之區勢必旁溢下有  
壅塞之處滂即難消聞撫臣見令各屬勘估興修但  
愚民無知上游方事挑濬而下游填實阻攔仍致水  
無去路於事何益著撫臣河臣親勘全局通盤計算  
務使一律疏濬深通毋令各分疆界稍有阻滯再豫



省之賈魯河原由江南地方全注入淮是廬鳳等處  
即豫省之下流也此時見在欽差大臣興修廬鳳等  
處河渠亦當同為留意從來疏濬河道時上游十分  
用力而下游百計阻撓各處人情如此不獨豫省為  
然是在封疆大臣洞悉其弊勿為所欺庶幾源委暢  
流永無泛溢之患

又

諭直隸地方水利未講以致水漲則受其害而平時未

獲其益前屢降旨令總督孫嘉淦等悉心籌畫善為  
經理據孫嘉淦具摺陳奏大槩講論河道情形至如  
何消除積水俾民間田畝收水利而免水害之處未  
曾詳悉奏及朕思此時乃水勢消落之際又值年穀  
收穫正宜董率官吏及時經營不但工程可以早竣  
而無業貧民亦可藉以餬口若不趁此時速為料理  
為未雨綢繆之計轉瞬春水長發又恐難以施工朕  
為閭閻疾苦時屢於懷為封疆大臣者當體此意可

即傳諭孫嘉淦知之

五年

命廷臣議淮揚各屬興修水利事宜大理卿汪滢等言  
淮揚下河九屬地介江淮瀕河臨海民間生計大  
都以水為利魚鹽之饒富田畝之灌溉商運之往  
來皆資於水臣訪之輿論下河之為害者有二最  
甚者開放高郵三壩次則東邊易進鹹水查高郵  
三壩因上洪澤湖之天然二壩而設今天然壩已

堅閉不開請將高郵三壩及昭關壩子嬰壩平撤以期永除水患更添閘三座以溉田畝上源無驟漲之水下源自無泛溢之虞矣其鹹水易進之處惟天妃與白駒三閘為甚今議天妃口建設閘座白駒三閘並行拆建其沿范公隄之丁溪小海諸閘內有上岡北草堰二閘頽壞更設於串場河裏口以致鹹水灌入請移建於串場河之外口其餘有牆石底石損壞者有閘板朽腐者俱應修葺以

時啟閉則鹹水之患亦除矣水患既除水利可興  
臣等勘下游諸水之大勢俱東北由鹽城界入海  
東塘河為分洩之要津久經淤墊迤下上岡草堰  
二閘內外河道亦淤應一律開浚其阜寧之清溝  
河蘇家嘴河山陽之涇河市河寶應之子嬰閘河  
興化之北官河溪河白塗河梓新河興鹽界河泰  
州之小紀宗村二河蚌沿河淮東兩分司所屬串  
場河以及溱潼河新河舊河皆灌溉所資鹽艘經

行之路今俱淤墊淺阻亦應挑浚范公隄綿長三百餘里應加築寬厚以資捍禦以上皆東流入海之路也其南流入江之水道則揚州以北之灣頭河董家溝芒稻河去江甚近自芒稻閘以下見在淺澁應加挑浚揚州城東之沙壩閘河水道淤墊亦應疏濬城南之揚子橋閘閘口過高應行改修其挑河所去之土令於兩岸三丈五丈之外堆成圩岸歲旱則引以溉田水大則聽其堵閉訪之居

民咸稱有益臣等更請將下河九屬田畝之毗近  
河渠者依此例于兩岸修築田圩高四尺底寬八  
尺頂寬二尺令有司勸諭居民於農隙之時如式  
修築嗣後雖遇雨水盛大之年可無虞淹漫矣疏  
入下大學士會工部議覆准行

修築松江海塘工成松江沿海東西兩塘改土為  
石長六千七百餘丈

海寧縣尖山壩工成

金  
卷六  
令修浚江北廬鳳潁等屬水道先是江寧布政使  
晏斯盛言鳳潁廬滁泗各屬皆有水利可興大學  
士等議令總理水利之汪滌德爾敏會同督撫詳  
勘定議

上允其議至是汪滌等言合肥城內之金斗河及洩水  
越河虹縣之枯河頭亳州之乾溪溝和州之太洋  
河姥下河牛屯河含山之銅城閘河來安之龍尾  
壩河俱淤淺不足資以灌溉應亟為挑浚滁州之



孟公石壩應改為閘合肥城東石閘已頽廢應修  
建五河城南蔣家壩應改土為石其餘各州縣陂  
塘溝渠圩埂土壩共六十二所向來民自行修築  
應飭地方官視年歲之豐歉量民力之能否隨時  
勸導次第興舉又壽州之安豐塘即古芍陂向為  
潴水之區今已淤成高地既不能蓄水反致阻遏  
水道若招民墾種可得良田五百餘頃每年農隙  
之時令種地之民於塘外挑成河道東西下游各

築土壩一道以備蓄洩可化無用為有用應俟督  
臣撫臣妥議辦理疏入令大學士等會議如所請  
行

浚河南之賈魯河先是河南巡撫尹會一奏請興  
豫省水利并浚賈魯河下游入渦會淮而安慶巡  
撫陳大受復言上游之水奔騰下注渦河淺窄恐  
不能容受工部議令總理水利大臣暨兩省督撫  
河臣會議務使有利無害

上從之至是汪隆等言豫省自開封府以南沿河七州縣之水俱歸江南之渦河見議所開河道雖有沙河桃河永利溝老黃河諸名其實本屬一河所濬者即舊有之水道也唯賈魯河原係入淮之河因水勢善濫故議於北岸設閘開河以分其勢所洩之水本自無多況流行四百餘里方入於渦自不至於江南有礙查豫省地居上游其水皆以江南為歸而入渦入淮稍有區別賈魯河入淮之水既

分洩入渦則渦水亦當分洩入淮庶上游下游之水兩得均平亳州迤下六十里渦河南岸有分流之水漳河一道由乾溪溝歷淝河以入於淮今應將漳河疏浚遇渦水盛大可以分洩大學士工部議應如所請從之

七年

命直隸總督高斌等往江南經理水利賑恤

又

論江南水災之後賑恤乃一時之補救而所以安養民  
生者全在明歲之農功自被水迄今已經兩月雖水  
漸減退不為大害而瀰漫之勢仍似從前若䟽濬稍  
後機宜則今歲田地斷不能盡皆涸出小民春耕無  
望彼嗷嗷待哺者何以為生況此時搭棚棲止於長  
堤者亦豈可以久處亟宜講因地制宜之策其如何  
䟽洩水道涸出田畝以安民業以奠居民著欽差大  
臣河道總督江南督撫悉心妥議速為經理毋得稽

遲

又

命大學士陳世倌會同高斌辦理江南水利明年正月  
陳世倌高斌等言淮揚徐海鳳潁泗七府州地既  
卑下又為百川匯聚歸江歸海之路黃淮二瀆為  
之經南北運河為之緯南以洪澤湖為之瀆而高  
寶邵諸湖承其下流入運分趨以歸於江海北以  
微山湖為之瀆入運分趨而駱馬湖承其下流以

歸於海夫水性就下下游多淤則上游之勢必遏  
上游既溢則下游之浸必甚若大閘尾閘分流暢  
洩使來水不及去路之多復於上游收束散漫之  
勢不使旁溢則縱有漲水可循流以漸趨於壑矣  
高寶諸湖之水自邵伯以上入海邵伯以下入江  
臣等面承

指授入江之路宜酌量加增竊查運河入江較入海之  
路為近而運河之水高於江面消納亦速若從興

鹽等縣入海路既紆遠而沿海地面高於內地外潮勢仰內河水低必俟潮退方可隨潮而出即疏濬極深又恐潮水內灌是入海誠不如入江之便今議於金灣滾壩之下東西灣地方添建滾壩二座分引潮水入於鹽河即於鹽河對岸挑石羊溝引河一道河頭建滾壩以應東西灣二壩并將鳳凰橋下引河及壁虎橋下流之廖家溝俱挑浚深潤歸石羊河以達於江其董家溝原歸芒稻河應



加挑使自為一河直注於江至芒稻閘河為通江  
之捷路一遇伏秋水漲啟放閘門恐鹽船淺阻請  
於芒稻閘以下仙女廟以上挑越河一道俾鹽船  
由此經由其泰州河舊有秦塘港白塔河百汊港  
三路入江宜改建閘門以時啟閉此湖水下游入  
江之路也黃河北岸則微山湖為上流所聚駱馬  
湖為下流所聚而中河居其間以為咽喉六塘河  
又承駱馬湖之下引衆流歸場河以為尾閭今議

將板浦以下場河速為挑濬其六塘南北二股及  
六里車軸等河之淺窄者悉加修治并於五丈義  
澤六里河頭各建閘以時減洩則黃河北岸之水  
亦不致泛溢矣上江鳳泗二屬南有漕河中有沱  
河北有濰河沱河久淤應將宿州之水導入漕河  
靈鳳等處之水導入濰河不使仍入沱河併將濰  
河下游之謝家溝浚深以資宣洩海州等屬則沂  
沭二河為大應將河身之淤墊者疏治民堰之殘

缺者堵築其餘兩江七府州屬支河溝渠應挑浚者約計百四十餘處庶水各有歸不致泛濫矣疏入

敕廷臣議履行之

詔䟽濬京城內外水道

八年寶山新築海塘工成寶山縣城東北自楊家嘴礮臺至車家墳止改土塘為石長一千三百丈准桑乾河開渠引水以溉民田直隸總督高斌言

桑乾河為永定河之上游可於南北兩岸各開大渠一道引水灌溉營治稻田從之

九年

命尚書訥親查勘江浙海塘訥親言海塘視沙之坍漲以為平險老鹽倉一帶柴塘向因江海迴流冲刷初非正溜移注故一經漲灘即化險為平但潮患常在北岸漲沙未可盡恃海潮向由中小疊出入若將故道開通分減北大疊之溜勢則上下塘工

悉可安堵即使不能遽行開通而潮汐情形與湖  
河迥異其日月衰旺既有期信隨長隨落為時非  
久若將險要處所酌量機宜多建坦坡木石餞壩  
俾其挑水掛淤實為捷要之法蓋有高沙則塘工  
即資鞏固有新沙則高沙不能坍塌柴塘一帶若  
辦理合宜不但未必改建石土向後並可免搶險  
之勞惟在該管員弁隨宜經理不可恃沙漲以為  
安不可妄矜潮汛以為險也江南沿海水勢較浙

省稍為寬緩惟華亭寶山二處溜勢頗急已建有  
石塘其餘沿海各工令該管官督率相機守護自  
可無虞冲卸工部議覆應如所請從之

令疏浚清水下游諸河道訥親言洪澤湖減下之  
水由高寶等湖至邵伯湖入運者則有泰州鹽河  
為歸江之路由高郵湖入運者各開壩分洩入於  
串場河為歸海之路然通江之芒稻閘通海之白  
駒天妃等閘皆閉蓄以濟鹽運既不能預為容受

之地洪澤湖減水既多宣洩不及即至漫溢民田  
因而洪湖不敢輕言宣洩然閉蓄過甚驟有漲溢  
上游受惠並及下游今議歸江之路宜浚鹽河也  
鹽河水深四五尺如皋以下益淺其底高於運河  
應挑深五尺使常足以資鹽運視運河之水有餘  
將芒稻諸閘啟放預為減洩再將寶應高郵二湖  
相連之華家灘大新河高郵邵伯二湖相連之王  
家港茅塘港並邵伯通運引河逐加挑浚俾循次

灌注為湖河遞減之法每年於重運過後四五月  
內行之即遇洪湖減洩盛漲亦差可容受不致有  
湖河先滿之患而芒稻各河更無宣洩不及之虞  
矣又歸海之路宜浚串場河也洪湖入運之水自  
高郵注官河以達串場河又邵伯頭閘二閘水亦  
分入串場河出天妃白駒小海丁溪諸閘歸海為  
下河宣洩之要道乃夏月水盈之時河水僅深二  
三尺白駒等閘常閉不開興化各湖河水無去路



稍增四五尺即淹浸為患蓋興化地窪而串場河  
淺之故也應將鹽城以南南北二串場河挑浚寬  
深使水恒渚蓄足資鹽運白駒等閘平時可相機  
啟閉盛漲則盡行開放其興化以上之高郵官河  
承南關車邏二壩為減水總匯之路河道淺窄難  
以容納而洩水之蚌沿梓新車路白塗海溝均應  
挑浚寬深以資利導再卽伯以上運河東岸各閘  
壩歸下河者合計寬一百四十餘丈而范公堤各

開口門止寬三十六丈來水多而去路少應於見  
在閘座多添金門會入各引河以廣其宣洩之路  
疏入

命大學士九卿集議令督河諸臣分別先後估計具題  
從之

又

詔興修畿輔水利大學士九卿議覆御史柴潮生奏河  
間天津二府頻歲亢旱請大發帑金經理畿輔水

利凡河渠浚泊有故跡可尋者重加䟽濬開溝建  
閘引水溉田凡待賑之民分段派工厚給其直所  
費雖多實為無窮之利臣等思北方地勢平行原  
有河渠浚泊水道可尋從前或行之未久輒就罷  
廢或奉行不善轉致虛糜遂謂北地水利不可興  
聽其自盈自涸而不為之均節有水無利而獨受  
其害雖天時之不齊亦人事之未盡也所奏興修  
水利事屬應行䟽入

命尚書劉於義往保定會同總督高斌詳議經理是歲  
協辦大學士尚書劉於義等陳水利十二事一宛  
平良鄉涿州境內之牝牛正支各河宜疏濬以消  
澀水一新城雄縣境內之白溝河宜濬支流以免  
漫溢一趙北口以東淀內支河宜分別開濬一東  
淀河道宜開通徑直一子牙河濁流穿淀宜另疏  
出口水門并築長堤分別清濁一附近永定南北  
之舊減水河宜疏歸鳳河一塌河淀尾閘淤塞宜

亟疏濬一唐河宜由廣利等渠引歸保定之府河  
一天津新安霸州諸河淀宜渠閘通引以沃民田  
一正定各泉宜開河引渠一舊有營田渠閘宜酌  
加修復一民間自營稻田宜酌給工本大學士九  
卿會議俱應如所請

命速行之至十年劉於義等又言一廣利渠以下應添  
建涵洞一望都以下沿白草溝河至清苑安肅宜  
開浚道溝一廣利依城二河宜挑減水河一張青

口以下應挑支河以分淀河之水一新安縣之新  
河應挑深以洩容城新安之水十一年劉於義等  
又言一塌河淀漲水應由七里海引歸薊運河一  
天津東北賈家口舊河應挑浚以洩積水一靜海  
迤東蘆北口應接開支河一南運河挽地汎應改  
挑引河尋又言一慶雲縣積水應浚馬頰河引水  
歸海一慶雲縣西南幕臺窪應挑溝引水入老黃  
河一慶雲縣四鄉洩水溝渠應開挑以疏積滯一

鹽山縣宣惠河應挑深洩積水入老黃河皆下部  
議行

令湖蕩蓄水之地毋許民入墾種戶部議准浙江  
上虞之夏蓋湖餘姚之汝仇湖水利攸關民人毋  
得侵占并令凡有湖蕩之地詳加察勘劃明界限  
不許再行開墾阻塞水道其從前已墾地畝亦令  
核明有無陞科分別辦理

十年

命江南督臣河臣查勘興修上下兩江水利至十一年  
兩江總督尹繼善等言洪溝河為毛城鋪之咽喉  
應於兩岸各築子堰堰內建涵洞及閘以洩民田  
積水灘河兩岸亦應各築子堰分設涵洞斗門其  
王家山天然閘河擬於尾閘改挑向南仍入灘溪  
口又天然閘河及峯山閘下引河五湖迤下之謝  
家溝俱宜挑挖寬深至潁州府之淝河年久淤塞  
應擇其淺窄之處浚之又自孟家橋以下民間私



築土壩設立魚蘄有礙水道俱當拆除蒙城南鄉之黃河北鄉之北泥河亦應挑浚此上江應修之水利也六塘河承駱馬湖之水至沭陽錢家集分為南北二股由鹽河入海宜築子堰設涵洞而上游之港河亦宜䟽浚建閘設堰以減駱馬湖盛漲之勢沭河發源東省入沭陽分為二支由漣河入海宜一例築堰立涵洞橋梁以消積水至山陽之吉家橋河鹽城之九曲河阜寧之橫溝河放生河

清河之民便河史家蕩古河安東之尤家蕩河桃源之劉老澗積水河海州之薔薇河俱宜次第挑濬築堰立閘此下江應修之水利也疏入令大學士工部集議飭督臣分別緩急估題興修從之

又

諭江南海州沐陽一帶頻年被災水患迭見今年仍復被淹朕詢問巡撫陳大受據奏稱海州之水下苦於鹽河之南北橫截使六塘南北潮河之水不得東流

上苦於沭河之水盡由於沭陽海州入海宣洩不及以致為害欲治海州之水下則當去鹽河橫截之弊令地方官視水大小一面及時開壩一面報明鹽院又令民修築圩圍廣留水道則海州之南可以無災上則當分洩沭河之源今於大山頭北四里溝八里湖地方正馬陵山腰斷處開一河引入贛榆之大興鎮河又於下流引一河南入新河頭北入園子河則上流既減下流自無四潰之虞再贛榆之三公河舊

為洩水之道因年久堵塞苟一挑浚積潦可消等語  
可諭尹繼善白鍾山令其委員查勘應作何開通疏  
浚之處妥酌辦理務使水患悉除民不罹災以副朕  
痼瘼民瘼之意至十一年兩江總督尹繼善言鹽河  
南北橫截一百三十餘里西有六塘南北兩股之  
水穿過鹽河由武障義澤六里等河歸北潮河入  
海因蓄水濟運鹽柴三處俱築草壩雖可隨時啟  
閉但六塘河數百丈之水奔騰而來三壩口寬不

逾十丈即及時開放亦宣洩不及請於武障義澤  
六里三河口各設滾水石壩數十丈高於河底五  
尺低於民田一尺水滿則洩水平則止既利民田  
亦無妨鹽運又贛榆之三公河年久堵塞亦應挑  
浚以消積潦至沫河發源莒州馬耳山由郟城之  
馬陵山東南流自宿遷至沫陽查大山頭北之四  
里溝八里湖地形稍窪中隔佃頭一嶺開鑿非易  
且引沫入贛雖有利於沫陽實有妨於贛榆毋庸

別開引河惟贛榆之圍子河上段淤淺之處宜開挑以洩異漲大沙河旁亦須加築子堰以資捍禦臣等更議開舊徽河等處以分沫水之流築沫河子堰以束沫水之勢則海沫贛三州縣水患可望減除從之

十一年

諭淮徐所屬州縣連年被灾緣該處地形本屬低窪而海州為衆流入海之區較他處為甚歷年經理河務

凡疏通宣洩之方俱隨其形勢挑挖前經陳大受奏稱六塘南北潮河之水盡由沐陽海州入海宣洩不  
及以致為灾經大學士等定議應行籌畫之處俱已  
加意料理而仍不免於水患者蓋因從前被灾稍輕  
處所俱不奏報遂覺被灾之時少今則無論灾之大  
小悉令奏聞是以灾傷屢告其實非今多於昔也海  
州為水之所潴蓄若該處免於澇則是本年雨少而  
高阜之地被旱必多矣惟是小民屢困沉灾朕心深

為憫惻所當多方籌度以圖善策即地勢低窪不能全去其患然去其太甚則受災之民少而積困亦可漸甦可令高斌會同尹繼善顧琮陳大受等務須商確妥協俾將來水患可望漸除協辦大學士尚書高斌等議請於海州所屬及淮徐二屬之宿遷桃源清河安東阜寧諸縣將窪地修築圩岸令業主出資佃戶出力於農隙時次第經理從之

禁民人私將池塘陂澤墾種以妨民田戶部議官



地民業凡有關於水道者概毋許墾種如自恃已  
業私將池塘陂澤改墾為田有礙他處民田者察  
出懲治如果於水道無礙聽其報官墾種改則陞  
科

皇朝文獻通考卷七